


# Ricercje promovude a plens vòts

L'ateneu furlan al passe cun sucès l'esam de Agjenzie Nazional di Valutazion dal Sisteime Universitari e de Ricercje (Anvur) rivant al otaf puest inte classifiche che, tignint cont de dimension di ogni ateneu, e met in confront la cualità des struturis di ricercje des 34 grandis universitàs. Il pès de universitàt di Udin dentri dal sisteime universitari al è di 1,24%, intant che il so pès, tignint cont de cualità de ricercje, al è di 1,36%, cuntune percentuâl di miorament dal 9,7%. Percentuâl che e sarà doprade par assegnâ la cuote di premi dai finanziamenti ministeriâl.

“O sin tant sodisfats di chest risultât – e declare la retore Cristiana Compagno – che nus colochè devant di ateneus di grant lustri e tradizion. La Anvur di fat e à ritignût di meti a confront lis universitàs su la fonde di un indicadôr composit che al ten cont sedi dal pès des diversis areis scientifichis dentri di ogni ateneu sedi, di la de cualità des publicacions, di altris tabelis impuartantis par fissâ la ecelence de ricercje, tant che la capacitât di atrai risorsis e di ingaiâ personâl di alte cualitàt”. Al è l'esercizi di valutazion de ricercje plui grant intal so gjenar mai fat a nivel internazionâl. La analisi de Anvur e à confrontât la cualitàt de ricercje di 133 struturis dentri des 14 areis scientifichis definidis dal Consei Universitari Nazional: in particular, a son stadis valutadis 95 universitàt, 12 ents di ricercje vijilâts dal Ministeri pe Istruzion, la Universitât e la Ricercje (Miur) e 26 ents “volontaris” (9 ents di ricercje e 17 consorzis interuniversitariis). 1450 esperts al lavor a an analizât e valutât ben 184.878 prodots di ricercje (tra articui, monografis e studis, ats di curvignis, brevets, manufats, notis a sentence, traduzions, programs, bancjis dàts, mostris, prestazions e cartografis).

L'ateneu furlan al conquiste l'otaf puest inte classifiche di valutazion de ricercje realizade de Agjenzie specializade (Anvur) che e à studiat i risultâts di 34 universitàs talianis.



I risultâts di Udin. L'ateneu furlan prin di dut al è stât metût tra lis grandis universitàs su la base dal numar di publicacions somgudis a valutazion di ogni struture. Dal pont di viste de cualitàt dai prodots de ricercje l'ateneu al è risultât parsore de medie taliane in nûf areis scientifichis su lis 16 analizadis (dôs des 14 areis a son stadis separadis in 2 sotareis par vè plui omogeneitàt scientifiche): Sciencis de antichitàt, filologjichis literariis e storicis artistichis, Sciencis

matematichis e informatichis, Sciencis fisichis, Sciencis biologjichis, Sciencis medicis, Sciencis agrariis e veterinariis, Inzegnarie industriâl e de informazion, Sciencis storicis, filosofichis, pedagogjichis e psicologjichis, Sciencis juridichis. Di chestis, trê areis (Sciencis medicis, Sciencis matematichis e informatichis e Sciencis de antichitàt, filologjichis literariis e storicis artistichis) a son rivadis a risultâts di ecelence.

Il metodi doprât. Il risultât positif al è dovût, in plui che ae cualitàt dai prodots de ricercje, ancje ae capacitât impuartante di atrai risorsis e al fat che la prestazion e je miorade une vore a pet dal exercizi precedent di valutazion dal 2003. Alte percentuâl di docents produtifs, basse percentuâl di prodots no di podè valutâ, eficacitàt de selezion dai prodots a mont, de bande dai uficis dal ateneu a son stâts i trê fatôrs clâf dal sucès dal ateneu furlan. “Udin al à vût sucès ancje parcè che al à pôcs docents improdutifs – al sotlinee Michele Morgante, proretôr e delegât ae Ricercje – a pet dal exercizi di prime che al veve misurât la ecelence de ricercje, chesto volte si è lâts a misurâ la cualitàt medie, viodût che, a difference dal passât, a son stâts cjapâts ducj i docents, ognidun di lôr al à vût di furni i siei trê prodots mior. Intal valutâ i risultâts des singulis areis i à ancje di tigni cont dal pès di ogni aree dentri dal ateneu e dal sigûr i risultâts a son positifs par dutis lis areis scientifichis che intal nestri ateneu a son plui rapresentadis e impuartantis”. L'ateneu udinês al è risultât dopo tant bon intal fâ la tierce mission, vâl a di trasferi i risultâts de sô ricercje al sisteime economic produtif, tignint cont de intensitàt dai rapuarts cu lis impresis, dai brevets otignûts e des impresis inovativis creadis.